



Aliye Sawa na Baba

Iweni na nia iyo hiyo ndani yenu ambayo ilikuwamo pia ndani ya Kristo Yesu; ambaye yeye mwanzo alikuwa yuna namna ya Mungu, naye hakuona kule kuwa sawa na Mungu kuwa ni kitu cha kushikamana nacho. —**Wafilipi 2:5,6.**

Lusifa akiwa mbinguni, kabla ya uasi wake, alikuwa ni malaika aliyeinuliwa juu na mwenye hadhi, anayefuata kwa heshima kwa Mwana mpendwa wa Mungu. Uso wake, kama zile za malaika wengine, ulikuwa unaoonesha upole na furaha. Paji la uso wake lilikuwa juu na pana, likionesha akili yenye nguvu. Umbo lake lilikuwa kamilifu; mwendo wake ukiwa wa kiungwana na adhimu. Nuru maalum iliangaza usoni mwake na uangavu uliomzunguka karibu naye zaidi na zaidi kwa uzuri kuliko malaika wengine waliomzunguka; licha ya hivyo, Kristo, Mwana mpendwa wa Mungu, alikuwa mkuu juu ya jeshi lote la malaika. Alikuwa mmoja na Baba kabla ya malaika kuumbwa. Lusifa alimwonea wivu Kristo, na hatua kwa hatua akaanza kujitwalia ukuu uliomhusu Kristo pekee.

Muumba aliye mkuu alikusanya jeshi la mbinguni, ili katika kuwepo kwa malaika wote aoneshe heshima ya pekee kwa Mwana Wake. Mwana aliketishwa kwenye kiti cha enzi pamoja na Baba, na jeshi la mbinguni la malaika watakatifu lilikusanyika kuwazunguka. Kisha Baba akawajulisha kwamba ulikuwa ni utaratibu Wake Mwenyewe kwamba Kristo, Mwana Wake, awe sawa na Yeye Mwenyewe; ili kwamba popote alipokuwepo Mwana, imaanishe kuwepo Kwake Mwenyewe. Neno la Mwana lilipaswa kutiiwa kwa haraka kama neno la Baba. Alikuwa amemsimika Mwana kwa mamlaka ya kuamuru jeshi la mbinguni. Hususan kwamba Mwana Wake alipaswa kufanya kazi kwa umoja na Yeye Mwenyewe katika uumbaji wa dunia uliotarajiwa na kila kitu chenye uhai ambacho kilipaswa kuwepo duniani. Mwana Wake angetimiza mapenzi Yake na makusudi Yake lakini asingefanya lolote kama Yeye binafsi. Mapenzi ya Baba yangetimizwa katika Yeye.

Lusifa alikuwa na wivu na kijicho dhidi ya Yesu Kristo. Licha ya hivyo, wakati malaika wote walipomsujudia Bwana Yesu wakitambua ukuu Wake na mamlaka Yake ya juu na utawala Wake stahiki, alisujudu pamoja nao; lakini moyo wake ulijawa na chuki na hasira...

Malaika waliokuwa watii na wakweli walijitahidi kumpatanisha huyu malaika mwenye uwezo aliyeasi na mapenzi ya Muumba wake. Walitetea kitendo cha Mungu kumpatia heshima Kristo na kwa urazini wenye ushawishi mkubwa walijitahidi kumsadikisha Lusifa kwamba hakupungukiwa heshima sasa kama alivyokuwa nayo kabla Baba hajatamka ile heshima aliyompatia Mwana Wake. Waliweka wazi kabisa, ya kwamba Kristo alikuwa Mwana wa Mungu, ambaye alikuwa pamoja na Yeye kabla malaika hawajaumbwa; na kwamba daima alikuwa akisimama katika mkono wa kuume wa Mungu, na mamlaka Yake ya upole, upendo hayakuwa yametiliwa mashaka; na kwamba hakuwa ametoa maagizo yoyote tofauti na yale yaliyofurahisha jeshi la mbinguni katika kuyatekeleza. Walisisitizia kwamba kitendo cha Kristo kupokea heshima ya pekee kutoka kwa Baba, katika kuwepo kwa malaika, hakikupunguza heshima ambayo Lusifa alikuwa ameipokea tangu mwanzo. Malaika walilia. Kwa shauku kubwa walijaribu kumbadilisha ili aache mpango wake mbaya na ajisalishe kwa Muumba wao; kwani wote hadi wakati huu walikuwa na amani na upatanifu... Lusifa akakataa kusikia (The Story of Redemption, 13-16).